

समै – 12:25 hrs.

<><><><><><>

Notification-Issued

भारती चुनांस आयोग नै जम्मू-कश्मीर च 77 नंबर नगरोटा ते 27 नंबर बडगाम विधानसभा हल्के आस्तै होने आहले उपचुनाएं दे सरबंथै च अज्ज इक अधिसूचना जारी कीती। कार्यक्रम मताबक मतदान 11 नवंबर गी होग ते वोटें दी गिनतरी 14 नवंबर गी कीती जाग। नामांकन जमा करोआने दी अखीरी तरीक 20 अक्टूबर रक्खी गई ऐ। नामांकन पत्रें दी जांच 22 अक्टूबर गी कीती जाग। नगरोटा विधानसभा हल्का भारती जनता पार्टी दे विधायक देवेंद्र सिंह राणा हुंदे निधन मगरा खाली होई गोआ हा, जिसलै के मुखमंत्रि उमर अब्दुल्ला होरें गांदरबल विधानसभा सीट बरकरार रखदे होई बडगाम विधानसभा सीट थमां इस्तीफा देई दिता हा।

<><><><><><>

Traffic

अज्ज जम्मू-श्रीनगर राश्ट्री जरनैली शिड़क पर हौली मोटर गड़्डियें गी छड़ा इक बक्खी जाने दी इजाजत ऐ। ट्रैफिक अधिकारियें आखेआ ऐ जे हौली मोटर गड़्डियां छड़ा जम्मू थमां श्रीनगर आस्तै जा करदियां न, जिंदे च नगरोटा थमां गड़्डिएं गी बड़्डलै 7 बजे शा 11 बजे तगर जाने दी इजाजत दिती गई। कुसै बी हौली मोटर गड़्डी गी दिनै दरान श्रीनगर थमां जम्मू जाने दी इजाजत नेई ऐ।

<><><><><><>

Jitender Singh IMD

केंद्री मंत्री डॉ. जितेंद्र सिंह होरें मौसम विभाग मुख्यालय नमी दिल्ली च आपदाएं बारै पेशगी चेतावनी सरबन्धी बवस्था ते मौसम ग्राम दी समीक्षा कीती। इस दरान उनें अपनी आत्मनिर्भरता राएं ढाई सौ करोड़ रपे दी बचत करने लेई मौसम विभाग दी सराहना कीती। मल्टी हैजर्ड अली वार्निंग डिजीजन सुपोर्ट सिस्टम इक ऐसा डिजिटल मंच ऐ जेहड़ा मौसम ते आबोहवा सरबन्धी खतरे दे बारै च फैसले लैने च मदद करदा ऐ ते आम जनता ते सरकारी एजेंसिएं गी समेसिर सौहगा करी दिंदा ऐ। इस्सै चाल्ली मौसम ग्राम इक वेबसाइट ऐ जेहड़ी भारती मौसम विभाग आसेआ तैयार इस्सै चाल्ली दी प्रणाली कन्ने जोड़दी ऐ ते इनें अपनिएं बवस्थाएं दी मदद कन्ने हून भारत गी मौसम बारै जानकारीएं लेई पैहे देइयै विदेशी मंचें पर निर्भर नेही रौहना पौंदा।

<><><><><><>

RS Candidates Nomination

जम्मू-कश्मीर थमां राज्यसभा दिएं सीटें लेई बीजेपी दे त्रै मेदवार, सत शर्मा, राकेश महाजन ते डॉ. अली मोहम्मद मीर सिविल सचिवालय श्रीनगर च अपने नामांकन दाखल करने लेई पुज्जी गेदे न। इस मौके पार्टी दे कई विधायक ते पार्टी दे सीनियर लीडर बी मजूद न। बीजेपी जम्मू-कश्मीर दिएं 4 राज्यसभा सीटें चा 3 पर अपने मेदवार तोहारा करदी ऐ, इस बारै घोशणा अतरू शनिवारें श्रीनगर च लग्गी दी बैठका च लैता गेआ हा। नेशनल कांफ्रेंस नै बी राज्यसभा चुनांस लेई अपने त्रै मेदवारें दे नाएं दा ऐलान कीते दा ऐ। एह मेदवार बी अज्ज अपना नामांकन दाखल करने लेई हुनै कोला किश चिर पैहले सचिवालय पुज्जे न। चुनांस 24 अक्टूबर गी होना ऐ।

<><><><><><>

Viksit Bharat Buildathon

मुल्खै दा सब्बनै थमां बड्डा स्कूल हैकाथान विकसित भारत बिल्डथॉन 2025 अज्ज बडलै 10 बजे थमां राती 11 बजे बश्कार आयोजित होआ करदा ऐ। विकसित भारत बिल्डथॉन इक राश्ट्रव्यापी पहल ऐ जेदे च 6मीं थमां 12मीं जमात तगर दे विद्यार्थिं दी रचनात्मकता ते समस्याएं दे हल गी तलाशने दे कौशल गी बढ़ावा देने आस्ते स्कूलें ते शिक्षकें गी साद्दा दिता जंदा ऐ। एहदे च विद्यार्थिं गी 4 विशेषार-आत्मनिर्भर भारत, स्वदेशी, मुकामी उत्पादें गी बढ़ावा देने यानि वोक्ल फॉर लोकल ते समृद्ध भारत दे विशे पर अभिनव प्रारूप तैयार करने आस्तै प्रोत्साहित कीता जंदा ऐ। एहदा सरिस्ता शिक्षा मंत्रालय आसेआ अटल नवाचार मिशन ते नीति आयोग दे सहयोग कन्नै कीता जा'रदा ऐ। आधिकारिक पोर्टल vbb.mic.gov.in या schoolinnovationmarathon.org/registration पर इस आयोजन दा सिद्धा प्रसारण कीता जा'रदा ऐ। एहदे तैहत 1 करोड़ रपे दा पुरस्कार बी रक्खेआ गेदा ऐ जिसी राश्ट्री सतह पर 10 जेतुएं, राज्य सतह पर 100 विजेताएं ते जिला सतह दे 1000 जेतुएं च बंडेआ जाग।

<><><><><><>

CS-NABARD

मुख्य सचिव अटल डुल्लू होरें जम्मू-कश्मीर च नाबार्ड दे ग्रामीण ढांचा विकास फंड आर.आई.डी.एफ तैहत हासल प्रगति दा जायजा लैने लेई मते इखतयारें आहली कमेटी दी अध्यक्षता कीती। बैठक च मुख्य सचिव होरें हत्थै च लैते गेदिएं परियोजनाएं गी तौले ते मित्थे गेदे समें दे अंदर-अंदर मुकम्मल करने दी जरूरतें पर जोर दिता। 2025-26 आहले माली बरे लेई अजें तोड़ी 7 ज्हार करोड़ रपे दी लागत आहिलयें 1 ज्हार 426 परियोजनाएं गी मंजूरी थहोई दी ऐ जेदे चा 36 प्रतिशत दी रकम खर्च कीती जाई चुकी दी ऐ। मीटिंगें च एह जानकारी बी दिती गेई जे नाबार्ड नै 2025-26 लेई 600 करोड़ रपे दी लागत आहिलयें 201 नमीं परियोजनां बी अलाट कीती दियां न। मुख्य

सचिव होरें मैहकमे गी आखेआ जे ओह मकाई लैते गेदे कम्में बारे रिपोर्ट जमा करान तां जे होर फंड जारी कीते जाई सकन ते विकास कम्में दा असर जमीनी सतह पर यकीनी बनी सकैं।

<><><><><><>

Ramban PMMVY

केंद्र सरकार आसेआ शुरू कीती गेदी प्रधानमंत्री मातृ वंदना योजना दा लाह जम्मू-कश्मीर च बी जमीनी सतह तगर पुज्जै करदा ऐ। रामबन जिले च बी पटेयाली महिलाएं ते बच्चें गी दुध पलेयाने आहली मौरी जननी सुरक्षा योजना थमां लाह हासल करै करदियां न जिनेंगी स्कीमै तैहत 6 जहार रपे दी रकम उपलब्ध कराई जंदी ऐ। एहदा लाह आंगनवाड़ी केंद्रें राएं लोकें तगर पुज्जदा ऐ जेदे नै महिलाएं लेई सतदार खुराक गर्भावस्था दरान दिक्खभाल ते बच्चें दे जन्म दे बाद दी दिक्खभाल दी बवस्था यकीनी बनदी ऐ। इस स्कीम कन्नै जुड़ने लेई लाभार्थी गी आधारकार्ड, गर्भावस्था प्रमाण पत्र ते बैंक दी डिटेल जमा करोआनी होंदी ऐ।

<><><><><><>